

RTHK 開心日報-「善亮人生」第五集：「活出生命動力」

華永會財務委員會容永祺主席、基督為本基金代表 BC Lo、參與計劃義工

Windy

受訪部份：第二部份 Part 2 (37:45-50:07)

主持：華人永遠墳場管理委員會同基督為本基金合作，以善亮人生為積極理念，兩年嚟推行一系列嘅生命教育活動。首先我哋有請華人永遠墳場管理委員會財務委員會主席容永祺先生，同我哋介紹一下。

容主席：其實華永會自 1991 年嘅三十幾年，係資助同埋推動過超過 3300 過嘅慈善項目。受惠人數係數以百萬計，累積捐款亦都係超過十億港元，出年係我哋華永會創會 110 年嘅日子，我哋係會繼續資助唔同嘅機構，去以積極正向嘅能量去舉辦唔同嘅生命教育計劃。就好似今次我哋同基督為本基金合辦嘅呢個生命教育計劃，就係希望比大眾重新思考個人生命嘅意義同埋價值，從而珍惜生命，善亮人生。

主持：講到呢到，我哋有請基督為本基金嘅代表 BC Lo，盧 sir 同大家介紹一下，究竟呢個系列嘅內容係點嘅呢？

BC：我係 BC Lo 盧炳松，我係大概五年前創立咗呢個香港唯一一個唔收費用，同成年人完成佢心願嘅機構。點解有呢個咁嘅想法呢？幾年前，我係一個主題公園度做，見到好多細路仔入來圓願，佢哋見到啲卡通人物之後就好開心，會好返。原本我諗住退休幫佢哋做義工，但佢地同話比我聽，佢哋只做 3 到 17 歲，18 歲以上就唔做。我又周圍去睇下，原來全香港係冇人做緊呢樣嘢，我就去同啲醫院傾啦，同有啲舒緩病房嘅醫生護士傾，咁我就話：「如果我做呢個咁嘅服務，你會唔會畀啲個案我呢？」佢哋話：「當然會啦，當藥物冇乜好大作用嘅時候，我哋希望佢起碼開心一下。」我哋就咁本住呢個心開始，初頭就好少個案，因為大家唔係好知我哋。咁宜家踏入第五年，舊年我哋因為華永會比我哋嘅幫助，我哋以前做十零二十個 case 一年，舊年做咗七十幾個，咁樣我哋真係都好開心，亦都好感恩，有華永會做我哋合作夥伴。

主持：容主席，我知道你華永會好好，除咗出錢之外，更加出力嘍，你快啲同我哋講解一下？

容主席：係啊，我哋除咗出錢資助之外，其實都扮演推動者嘅角色，出心出力，同唔同嘅慈善機構合辦生命教育項目，推進彼此之間嘅互動協作，同埋令慈善項目可以更有效嘅去推動，例如我哋華永會係 2020 年翻新秘書處辦公室，騰出咗好多個空間，免費比社會福利機構去舉辦活動。今次我哋就免費提供場地畀基督為本基金，舉辦義工嘅培訓班。

主持：BC 啊，呢個圓願計劃，當中你就會搵義工幫手㗎喎係咪？

BC：係啊，我哋就會搵義工幫手啦，亦都好多謝華永會，因為我哋啲細嘅慈善團體呢，只有幾百呎嘅 office，每次 training 我哋只可以坐 20 人，但華永會就提供畀我哋場地，我哋可以去申請，可以每次坐 75 人，我哋過去 12 個月係個到 train 咗近千人，我哋以前根本冇可能有咁嘅地方去可以培訓到，亦因為佢哋可以培訓到，我哋可以招收多啲嘅義工，多啲義工就可以幫我哋做多啲個案，成為一個好好嘅促進作用。

主持：再想問容主席，點解華永會會咁積極推廣孝道當中嘅孝呢？

容主席：孝好重要，因為孝係我哋中國人傳統文化精粹，百事以孝為先，呢個理念更加係深深植入我哋華人家庭裏面，例如華人嘅慎終追遠、重視春秋二祭，亦都係正向家庭關係嘅體驗。其實我哋都好清楚，良好嘅家庭關係，對青少年嘅成長係起咗非常積極嘅作用。呢個都係我哋點解華永會，係會積極推廣華人傳統美德，同埋係鼓勵親情嘅原因。

主持：其實 BC 你心目中孝道都有四個重點，不如你同我哋分享下。

BC：我哋最近就同城市大學合作做咗啲研究，我哋希望引入一種叫家庭尊嚴治療，就係當一個人病咗嘅時候，就好多時候無乜尊嚴，但係我哋會同佢講，唔好擺曬啲時間去醫病，你搵一件事出來我同你傾，講佢人生最光輝嘅時候。研究嘅過程中間，我哋就發現中國人講嘅孝道有四個好重要嘅元素，除咗爸爸媽媽好食好住，唔好畀佢哋餓親。第二樣嘢，唔好畀佢地衣衫襤褸。第三樣，就係唔好叫佢掛住你。咁第四樣，唔好叫佢地有一啲事佢掛住心目中，唔可以放下去走。後面嗰兩樣嘢，我哋都做到，即如果我哋同佢圓願嘅話呢，唔單止佢父母可以唔使掛住個子女，仲有父母如果佢自己有咩心願，或者有啲乜嘢，可以放下咁走完人生道路，所以係孝道上面，我亦都發覺我哋呢個圓願服務係有一個幾大嘅提倡作用。

主持：咁「圓願有者」計劃呢個服務又係點嘅呢？請盧 Sir 同我哋介紹一下。

BC：其實個計劃分開兩類，一類就係我哋幫一啲臨危嘅病人，係佢走完人生嘅道路之前，有啲咩心願我哋去幫佢達成，這個我哋叫圓願服務。因為要做呢個服務嘅時候，我哋唔單止唔收佢哋費用，我哋亦都會影啲相，我哋會做一個相簿畀佢，本相簿大概有 30 到 40 張相，之後都會做一個 video，咁呢一個片段呢大概 3 到 6 分鐘，講佢嘅圓願過程，亦都邀請佢啲親戚朋友，叫佢加油啦，或者佢自己本身有啲乜嘢想對佢親戚朋友講呢，咁就去講嘅。咁點解做呢嘢呢？因為我哋嘅口號就希望佢哋「告別遺憾，留住回憶」嗰個回憶就係靠本相簿，同靠個 video 啦。

主持：係當中，我估都會遇到好多好深刻嘅故事，可唔可以同我哋分享少少？

BC：來我哋到，叫我哋同佢一齊去圓願嘅人，最後生就得 20 歲，最老嗰個呢係 102 歲。20 歲嗰位，佢係一個年青嘅拳手，大學已經收咗佢入去讀社工系，但係佢有骨癌。佢嘅心願好簡單，佢就希望有人可以同佢做生日，咁我哋就同佢做生日會，估唔到做咗生日會之後呢，幾日佢就走咗。如果你問我印像最深刻，最近我哋做咗一個係中文大學嘅中文系講師，咁佢四十幾歲，佢自己有幾兄弟姊妹，佢係孺女，同媽媽關係好好，其中佢有啲嘅哥哥同媽媽關係麻麻地，咁佢就臨走之前，用自己嘅名義同媽媽做生日會，約曬佢啲哥哥，同埋佢啲家人，同媽媽一齊和好，佢做完之後唔夠十個鐘頭就走咗喇。一方面為佢高興啦，佢可以放下佢嘅心願啦，第二方面，我哋都覺得人生係好無常。

主持：BC 會唔會就係因為呢啲唔同嘅感動嘅故事，令到你幫多啲手呀？會唔會呀？

BC：會，華永會同埋仲有其他唔同嘅機構，最近畀到我哋一啲資助啦，宜家開始我哋唔單止係做一般人啦，我哋連例如有啲失明人士，嚴重肢體傷殘，我哋都開始做。咁我哋最近做一個，就係有一個 70 歲嘅失明人士，佢三歲嘅時候就係因為病，當年即係七十年前香港係好窮，咁佢冇錢睇醫生，佢隔離嗰個鄰居呢就同佢敷咗啲山草藥，點知佢兩隻眼就壞死，眼珠就跌咗出嚟，三歲開始盲，入咗去心光盲人院，教咗一啲係庇護工場做嘢嘅技能。但係佢對音樂好有造詣，佢自己玩好多音樂，佢曾經呢就係比美國白宮邀請佢，喺老布殊嘅面前，一個四人嘅中樂小組，佢自己就負責吹簫嘅。你睇到佢，其實佢係對音樂好開心、好熱愛。但係點知呢就中風，一場中風呢乜嘢都做唔到，佢宜家身體都唔係好好，佢同我哋講，佢嘅心願就再係聽一次交響樂。我哋就好幸運，係

西九，香港管弦樂團有個演唱會，而係一個鐘頭，咁就啱啱佢嘅精神同精力完全可以應付，我哋團隊就走咗去盲人院，就車咗佢去西九，然後佢聽完之後，佢講好多好多嘢，佢好開心。我哋甚至安排咗佢同埋音樂樂師一齊交流下，咁你知佢以前玩音樂嘍嘛，佢哋就好多共同語言，我哋覺得短短嘅一個同行，都係畀到佢一個好大好大嘅歡樂。

主持：跟住落來，我哋搵到義工 Windy 同我哋分享下，佢參加咗呢個計劃之後嘅得著同埋改變。

義工 Windy：8 月 7 號呢，我就第一次出隊喇，咁個日出隊呢，就幫婆婆，阿婆婆佢有腦退化同埋肝癌末期，佢就喺跑馬地住咗幾十年，佢就想返去，因為佢有病之後，就返咗去個大仔度住，佢就好想舊地重遊跑馬地、見下啲街坊、去下啲髮型屋呀、食吓啲茶餐廳呀、同埋藥房啲啲咁啦。我哋就有義工、有攝影師呀、護士、醫生呀，隨隊同佢一齊一天遊，還佢嘅心願。我哋就幫手影下相，同埋我哋做完呢個訪問之後，我哋就同佢做番本相簿，拍返個 video。咁盧生就叫我：「你出隊嘞，不如你幫手做旁白啦。」咁我就膽粗粗應承咗，咁做咗就覺得好開心幫到佢。做完呢個圓願之後呢，咁我其實有個心願就係，都想同我媽媽影返啲相，做返個 video，如果第時媽媽走咗之後，我可以睇返啲相啊，聽返個 video，我有個回憶囉。

主持：BC 你係咪都好開心呀？

BC：係呀，因為助人為快樂之本，咁我覺得幫助人，其實自己係第一個先先受益。